

Yaaqub^(a.s) Aur Unke K̄haandaan Waale Misr Me Phale-Phule

Taurait : K̄hilqat 46:29-30; 47:5-6, 27; 48:1, 8-11, 21; 49:33; 50:22-24

46:29-30

Jab Yusuf^(a.s) ko patā chalā ki unke waalid Misr ā rahe haiñ, to unhone apnī sawaarī ko taiyaar kiyā aur unse milne ke liye rawaanā ho gae. Yusuf^(a.s) apne waalid se Misr ke ek shahar Goshen me mile. Jab Yusuf^(a.s) ne apne waalid ko dekhā to unhone unko gale lagaayā aur kaafī der tak rote rahe.⁽²⁹⁾ Tab Yaaqub^(a.s) ne kahā, “Ab mainī sukun se mar saktā huñ kyunki maine ab tumhaarā chehrā dekh liyā hai aur mainī jaan gayā huñ ki tum ziñdā ho.”⁽³⁰⁾

47:5-6, 27

Tab Firaun, Misr ke baadshaah, ne Yusuf^(a.s) se kahā, “Tumhaare waalid aur tumhaare bhaāī tumhaare paas ā gae haiñ⁽⁵⁾ to tum Misr me koī bhī jagah unke rahne ke liye chun sakte ho. Apne waalid aur apne bhaaiyoñ ko sabse acchī zameen do. Unko Goshen me rahne do aur agar wo ek acche charwahe haiñ to merī gaayoñ kī dekhbhaal bhī kar sakte haiñ.”⁽⁶⁾

Yaaqub^(a.s) Misr me Goshen kī zameen par rahe unkā k̄haandaan bahut phalā-phulā. Wo log wahaan zameeñdaar ban gae aur bahut behatreen zindagī guzaarī.⁽²⁷⁾

48:1, 8-11, 21; 49:33

Kuch waqt ke baad Yusuf^(a.s) ko patā chalā ki unke waalid, Yaaqub^(a.s), kī tabiyat k̄haraab hai. Wo apne donoñ beṭoñ ko le kar unse milne gae.⁽¹⁾

Jab Yaaqub^(a.s) ne Yusuf^(a.s) ke beṭoñ ko dekhā to puchā “Ye bacche kaun haiñ?”⁽⁸⁾ Yusuf^(a.s) ne kahā, “Ye mere beṭe haiñ, ye wo laḍke haiñ jo Allaah taa’alā ne mujhe atā kiye haiñ.” Yaaqub^(a.s) ne kahā, “Apne beṭoñ ko mere paas le kar āo taaki mainī inheñ barkat de sakuñ.”⁽⁹⁾ Yaaqub^(a.s) bahut buzurg ho chuke the aur unkī nazar bhī bahut kamzor ho gaī thī. Yusuf^(a.s) laḍkoñ ko waalid ke kareeb laae to unhone laḍkoñ ko pyaar kiyā aur gale lagaayā.⁽¹⁰⁾ Tab Yaaqub^(a.s) ne Yusuf^(a.s) se kahā “Mujhe naheñ lagtā thā ki mainī ab kabhī tumheñ dekh paauñgā, lekin dekho Allaah rabbul kareem ne mujhe tumse aur tumhaare bacchoñ se milā diyā.”⁽¹¹⁾

Tab Yaaqub^(a.s) ne Yusuf^(a.s) se kahā, “Dekho mere marne kā waqt bahut qareeb hai, lekin Allaah taa’alā tumhaare saath hai aur wo tumko tumhaarī purkhoñ kī zameen tak le kar jaaegā.”⁽²¹⁾

Jab Yaaqub^(a.s) apne beṭoñ se baat kar chuke to waapas apne bistar par leṭe aur inṭiqaal farmā gae.⁽³³⁾

50:22-24

Yusuf^(a.s) apne waalid ke ghar waaloñ ke saath Misr me hī rahe aur ek sau das saal kī umr me inṭiqaal farmaayā.⁽²²⁾ Yusuf^(a.s) kī zindagī me unke beṭe Ifraaeem ke bacche hue aur pote hue, aur unke beṭe Manassā ke ek beṭā huā jiskā naam Makkiyā thā. Yusuf^(a.s) ne apnī zindagī me Makkiyā ke bacchoñ ko bhī dekhā.⁽²³⁾ Jab Yusuf^(a.s) apne āk̄hirī waqt me pahuñche to unhone apne bhaaiyoñ se kahā, “Mere marne kā waqt bahut qareeb hai lekin mainī jaantā huñ ki Allaah rabbul kareem tumhaarā k̄hyaal rakhegā aur tumko is mulq se nikaal kar us zameen par le kar jaaegā ki jiskā waadā usne Ibraaheem^(a.s), Ishaq^(a.s), aur Yaaqub^(a.s) se kiyā hai.”⁽²⁴⁾